

Ingvar Stenström

Formation de parolas in Interlingua

**Societate Svedese pro Interlingua
1999**

Un del pioneros de interlingua, Ingvar Stenström (Svedia), presenta le maniera in le qual le parolas de interlingua appare.

Como professor de linguas ille inseniava durante plure decennios interlingua in le gymnasios svedese, e ille es le autor del manual probabilmente le plus traducite in le mundo, “Interlingua – instrumento moderne de communication international”. Ille ha sempre interessate se pro le linguae e describe ci con multe exemplos le structura de interlingua.

Ingvar Stenström: Formation de parolas in Interlingua
ISBN 91-971940-4-2

Formation de parolas in Interlingua

Parolas – morphemas – phonemas

Quante parolas ha il in Interlingua? Le Interlingua-English Dictionary (IED) contine 27000, le dictionarios de Piet Cleij 45000 e tanto plus longe un investigator (diligente como Piet Cleij) cerca le vocabulos conforme al principios de Interlingua, tanto plus de parolas essera includibile.

Esque le persona qui vole apprender le lingua del parolas international dunque debe inculcar in su capite 50000 vocabulos? No. *Ille debe apprender un numero de morphemas e le mechanismos de formation de parolas.* In mi opinion le numero de tal morphemas in Interlingua – si on non vole exprimer se in un campo specialisate: botanica, zoologia, philosophia, ingeneria etc. – non excede 15000, forsan le morphemas vermente “general” non es plus que 10000.

Il es dunque desirabile, mesmo necessari pro non espaventar usatores futur. que on, parlante del amplexo del vocabulario de Interlingua, explica clarmente le factos sequente:

- Nulle persona ha besonio de tote le vocabulos de un lingua (Duo expertos de specialitates diverse pote cata uno posseder e maestrar 10000 terminos que le altere experto non sape del toto.).
- Le numero de *parolas indispensabile* in le vita quotidian es multo plus limitate: 2000-3000 parolas.
- Habente apprendite le structuras del formation de parolas on besonia apprender 2000 *morphemas*, morphemas de base e affixos e post isto un interlinguaphono ha jam un instrumento de comprehension adequate pro le majoritate de situationes, proque 2000 morphemas es facilmente transformate in 7000-8000 parolas.

Que es dunque iste miraculose “morphemas” que evidentemente face multo plus facile le vita del povre studente de linguas? (Ecce jam un tal parola, que non es obligatori in le tresor del parlator general.)

Como nos sape le “vocabulario international” se trova ubique, in tote linguas que ha su origine in Europa, a un extension variante. Illo es de facto un tresor commun e le capabilitate de analysar iste parte de su proprie lingua es de alte valor pedagogic e – io volerea dicer – cultural. Un tal

analyse methodic como parte del curriculo gymnasial esserea un demonstration del hereditage europee e adjuta indiscutibilemente le apprenzion de altere linguis – nos lo sape per longe experientia in Svedia.

Ante comenciar le explications es necessari

Definitiones de “parolas” - “morphemas” - “phonemas”

Un morphema es le minime elemento de un parola que porta un signification. Un parola consiste de un o plure morphemas.

In-cred-ibil-itate es un *parola* consistente de quatro *morphemas*

Un morphema consiste de un o plure phonemas.

Un phonema es le minime elemento de un morphema que lo distingue de un altere morphema.

Ex. In le morphemas *p a r* e *r a r* il es evidente que le prime *r* in *rar* cambia le signification de *par*. Illo es un altere morphema, in iste caso tamben un altere parola.

Un phonema es representate per un littera o un combination de plure litteras. Un phonema pote pronunciar se con sonos differente, sed si iste sonos non cambia le signification, illos non es phonemas. Exemplo “*rar*” pronunciate per le uvula in loco de per le apice del lingua, i.e. [RaR] in loco de [rar] non evoca un altere idea, e per consequente non es un nove morphema.

Que nos retorna al morphemas!

Le morphema que porta le signification le plus importante se nomina morphema de base, p.ex. *cred* in nostre exemplo in supra.

Morphemas que precede le morphema de base es prefixos e morphemas que es addite post le morphema de base es suffixos. (Il ha etiam le minus importante infixos, p.ex. *n* in *vi-n-cer* e *m* in *ru-m-per*; le morphemas de base se vide in *vic-t-oria* e *rup-t-ura*. Le infixos es sin interesse in le formation active de nove parolas).

Typos de formation

In le linguas germanic il es possibile formar un numero quasi illimitate de nove parolas per combinar un o plure altere parolas. In anglese sovente per simple juxtaposition de duo substantivos o, como in le linguas scandinave

per junger los in un sol, a vices assatis longe vocabulo. In le jornal de hodie io legeva le parola svedese “eurovisionsschlagerfestivalsrepetitionerna”, que es facile a decifrar e comprender mesmo a non-scandinavos. Dividite secundo morphemas illo pare plus clar assi:

euro-vision-s-schlager-festival-s-repetition-er-na.

In isto le -s- es morphema del genitivo, -er- del plural e -na le articulo definite postpositional, i.e. morphemas grammatic

In Interlingua iste typos es rar. Le parolas componite se substitue per combinationes analytic de substantivos e adjektivos sovente relationate per prepositiones. Le “teacup” deveni “tassa a the”, le german “Holzkohle” deveni “carbon de ligno”, “Schutzdach” “tecto protective” etc.

1. Parolas componite tamen existe.

1 A: Combinationes de substantivos ligate per un vocal ligative, -i- in parolas de origine latin (*silv-i-cultura*), -o- in vocabulos grec (*psych-o-logia*). (Il ha un regula practic pro discerner qual vocabulos es grec: illos contine un y o le digraphos /Sic!/ ch, ph, rh o th o le suffixo -ic).

1 B. Verbo in le presente + un substantivo. Iste combinacion sovente indica un utensile, per le qual on manea un objecto. Ex. aperi-lattas, conta-kilometros, coperi-catena (de un bicyclo), guarda-fango, lancia-granatas, lancia-torpedes, porta-aviones, pressa-limon/es/, sicca-capillos, tira-lineas, torna-discos. Karel Wilgenhof, le plus profunde experto del vocabulario de IED ha publicate un ample studio i.a. de iste formationes in *Currero* numero 59. (Contrariamente a Wilgenhof io pensa que on debe inserer le lineetta de ligation inter le verbo e le objecto, proque le parolas de iste modo deveni minus longe e plus facile a recognoscer.

1 C. Juxtaposition simple: motor Diesel, nave pharo, nave viking.
Incomparabilemente plus numerose es

2: Derivation per affixos

2 A. Per prefixos

Le morphema de base **port-** + le vocal del classe verbal principal **-a-** + **-r**, le sol signo del forma infinitival, resulta in le verbo **portar**. Per le addition de prefixos e altere suffixos, cuje significationes on debe apprender si tosto

como possibile, nove series de parolas es create.

ex-portar, ex-porto, ex-porta-a-t-ion, ex-port-a-t-or

im-portar etc.

re-portar, re-porto, re-port-a-t-ion re-port-age, re-port-ero

trans-portar, trans-porto, etc.

ad-portar (Le incontro del consonante final del prefixo e le consonante initial del morphema de base causa un **assimilation**, e le duo consonantes deveni plus simile le un al altere a fin de esser plus facile a pronunciar), **apportar, apporto. Apprender** es un altere exemplo.

Assimilation (<ad-simil-a-t-ion) es le influentia del consonante initial del morphema de base sur le consonante final del prefixo. Illo pote esser *assimilation total* como in apprender o *assimilation partial* como in importar, ubi le consonante nasal-dental **-n** se approxima al consonante labial sequente, que es pronunciate per le labios (un nasal-labial) e assi deveni **-m**.

In- con le duo significationes “opposito de” (apud adjectivos) e “in-, in le direction intro, o essente intra” (apud verbos o derivatos de verbos) es quasi sempre assimilate. Isto es valide etiam pro **ad-**, e vidente consonantes duple on pote quasi sempre supponer un assimilation. Isto es utile a saper, proque **ab-** con le signification opposite (illo indica un allontanamente) non forma assimilationes, un **bb** dunque non pote esser un composition con **ab-**. Iste prefixo ha duo variantes combinatori: **abs-** ante **c** e **t**, e **a-** ante **v** e **m**. Exemplos: **abs-cesso, abs-tin-e-nt-ia, abs-trah-er; a-vert-e-r e a-mov-e-r**.

Iste sorta de cognoscentia servi le analyse solmente, in general on non forma nove parolas per iste variantes del prefixos. Iste parolas “jam existe”.

con- (como in con-fluentia) es un altere prefixo con variantes assimilate:

con- e su variantes (allomorphos) ha duo significationes multo differente:

1. Quasi identic con le preposition **con**: with, /zusammen/ mit, avec, i.e. indicante le presentia de duo o plures; contacto; habente... Ex. Io veniva con mi filio e nos mangiava con gusto carne con patatas rostite.

2. Intensification del action. Com-batter = “batter usque le victima es vincite”. Cor-roder = “roder usque al destruction complete (del metallo)”.

col- ante **l-**. Ex. col-laborar, col-luder

com- ante **b-** e **m-**. Ex. com-batter, com-mover

cor- ante **r-**. Ex. cor-rumper, cor-roder

co- ante **vocal** e **h-**. Ex. co-operation, co-exister, co-herente. Sovente con un notion accessori de partenariato. Ex. co-pilota, co-idealista

Un simile duple signifaion ha **per- 1..** = le preposition. through, by means of, by. Ex. per-forar, **2.** Como in **Con-** **2.** Ex. Per-durar, per-enne (per annos), per-sequer, per-secution, (sequer alcuno usque on le trova o puni); per-verter = verter se multo ab lo que es normal.

ante- e **post-** es duo prefixos identic con le prepostiones, sin assimilationes. **anti-**, **contra-**, **circum-**, **pre-**, **auto-** e **amphi-** (prefixos grec), **gran-** que indica un persona del mesme familia un generation remote, **super-** e su synonymo grec **hyper-** e su opposito **hypo**, **re-**, **retro-**, **ultra-**, **equi-**, mis-(erroneemente) - ecce un longe serie de prefixos que se “comporta” ben e non se cela per assimilationes o variantes. Certe alteres on debe observar: Le pares **extra-** indica que un cosa se trova extra un altere, **extro-** indica un movimiento de un cosa ex un altere. Ex. extra-mural, extro-vertite.

Paralleles es **intra-** se trovante in ...; **intro-** se movente a in.... Ex. introduction. **Inter-** debe esser strictemente separate de **intra-**; le differentia es grande inter *intercellular*: “inter le cellulas” e *intracellular* “in le cellula/s”.

Le suffixos grec, essente usate preponderantemente in le scientias, es rar, sed sin complications identificabile. **Pan-** total, tote, **proto-** le prime, le originari. Illos es assatis clar. Le prefixo privative grec **a-** con le significacion non habente..., sin ..., pote causar confusiones con le variante combinatori del prefixo latin **ab-**.

de- 1 = le preposition *de*, i.e. distantiamento: de-cafe-in-ar, de-calc-ific-ar
2. “Movimento de alque o alcuno a basso”: de-scender.

3. concernente (como le preposition in “parlar/scriber de”): de-scrib-er
dis- 1 opposito: dis-contente, dis-ordine.

dis- 2 distribution, “in omne directiones”. Dis-seminar, dif-ferente, di-ver-ter

Dis- es assimilate e ha ante consonantes sonor le variante (allomorpho) **di-**.

ex- appare como **e-** ante consonantes sonor: e-gres-s-o, e-lec-t-ion, e-radi-car, e-vacuar, e-vader, e-vocar; **ef-** ante **f-**: ef-fluentia, ef-fortio.

sub- sovente assimilate: sub-premer > sup-primer; variante ante **p-** e **t-**: **sus-**: sub-pender > sus-pender. (Le signification del suffixo a pena distinguibile:) sub-tener > sus-tener.

trans- trans-atlantic. Duo variantes: 1. **tra-** ante certe **d-**: tra-ducer.
2. **tran-** ante **s-** Tran-silvania, tran-scription.

Discutibile e dubiose es a vices le selection de IED inter **dis-** e **de-**. Es vermente *dispopular* preferibile a *depopular* (facer emigrar le population de un pais)? *Dispopular* ya de facto pote significar *impopular*. *Disflorar* con duo significationes al latere de *deflorar*? Le protypismo in absurdum!

(Il ha casos in le quales le signification de lo que esseva originalmente un composition con un prefixo se ha tanto pallidisate que il servi a nihil facer un analyse).

2 B: Derivation per suffixos

Le spatio non permette un tractamento complete del suffixos. Principalmente le definitiones exigerea longe explicationes, que forsan potera sequer in un edition elargate, si un tal esserea demandate.

Nota un regula importante: un vocal final de un morphema de base es omittite ante le addition de un suffixo. Cultur-a > cultur-al, femin-a > femin-in, vir-o > vir-il.

Substantivos > adjetivos

-al Le desinentia le plus frequente de adjetivos: “pertinente a o characteristic de”: cultur-al,

-ial Variante sovente usate post -nd, -nt-, -rd-, -rt-: mund-ial, confident-ial, cord-ial, part-ial.

-ar Variante usate si le morphema de base contine un -l-: stell-ar, cellular.

-ari Rar: legenda - legend-ari, revolution - revolution-ari.

-esc “In le stilo de ...”, “typic pro ...”: barbar-esc, cavaller-esc, leon-esc, student-esc.

-ette Diminutive, caressante: belle > bellette.

-il Rar. Non productive o “non active”, i.e. nulle nove parolas es formate con iste suffixo: viro - vir-il, infante - infant-il, puer-o/-a - puer-il.

-in Usate in poc parolas frequente, sed productive pro designar derivatos chimic e medicamental: aquil-in, can-in, equ-in, femin-in; alcal-in (< alcal-li).

(In Interlingua Grammar, pagina 62, se trova un nota interessante e poco observate: “Le forma substantivisate **-ino** pote esser usate pro designar le

progenitura, le juvenes de animales.” Catt-ino, leon-ino. Proque non?)

-ose “Plen de”, “ric de”: pericul-ose, orgoli-ose.

-i/an 1. Pertinente a un habitante o al lingua del stato X o al loco Y: America - americ-an. Roma - romano.

2. Characteristic de un adherente de un persona, propheta o ‘guru’.

-i/ano/-ana Substantivisation masculin respectivamente feminin: un americano/americana, norvegiano: christ-iano, luther-ano *Attention: Tamben le lingua:* Simona parla romani-ano.

-ese Synonymo et de **-//an 1** et de **-i/ano 1.**: franc-ese, sved-ese.

-esa Synonymo del substantivo **-i/ano** = habitante o lingua de: Kim es un svedesa.

Verbos > adjetivos

-nte Participio presente: cant-a-n-te, leg-e-n-te , aud-ie-n-te.

-ide Adjectivo non productive pro verbos del classe **-e-**: tim-er > tim-ide; rig-er > rigide, frig-er > frig-ide, ferv-er > ferv-ide. (Substantivos correspondente se forma con **-or**: tim-or, rig-or etc.)

-at-, -it- forma le participios perfecte del verbos del classe -a respectivamente del classes -e- e -i-. Illos es adjetivos e sub-stantivabile. Illos es tamben identic al thema supinal que precede alcun suffixos. Un ter-tie e quarte forma del suffixo supinal del latino esseva -t- e -s-.

-at- Educate (un educato),

-it- (Un libro ben) scribite, (un obra) finite.

-t- aper-te

-s- Confuse (< con-fu-n-d-s-e), per-ver-se (< per-vert-s-e)

-ive es un del suffixos adjectival que debe esser precedite per iste formas: conserv-at-ive, educ-at-ive, defin-it-ive, re-gre-s-s-ive (re-grad-s-ive).

-at/ori Adjectivo relatate a un “**-at/or**”, un persona qui (face alque): laud-ar, laud-at-or, laud-at-ori. Un oration laudatori.

-bile (-a-bile pro verbos del classe -a-, -i-bile pro le classes -e- e -i-)

1 que pote esser-te: cant-a-bile, leg-i-bile, aud-i-bile.

2 que es digne de esser-te: honor-a-bile. (Wilgenhof in su *Notas mixte* folio 50, informa que iste suffixo da nascentia a 637 nove parolas in IED. Il probabilmente ha plus de tales!)

De interesse plus tosto historic es le variante **-ile** in *facile* que pote esser interprete como *fac-ibile*, *doc-ile* e *ut-ile* (ex un verbo latin *uti*).

Adjectivos >substantivos

- essa** 1 Le qualitate de esser: fin-essa, trist-essa.
- ia** 1 Synonymo frequente post -**nte**: toler-a-nt-ia.
- ia** 2 Specialmente
- itate** Synonymo de ancora plus grande popularitate e productivite que: - essa.
- itude** Rar. Non productive: grat-itudo, lat-itudo, ampl-itudo.

Adjectivos > verbos

- i-fic-a-r** Facer/render qualcosa: pur-i-ficar. Usate tamben post substantivos: petr-if-icar.
- is-a-r** Synonymo: re-al-is-a-r, civ-il-is-ar

Nove substantivos ex substantivos

- ada** 1 Producto facite ex: limon-ada. Orangi-ada.
- ada** 2 Serie de: column-ada, fenestr-ada.
- age** 1 Un ‘unitate’ consistente de: banda > band-age, folio > foli-age.
- alia** Collection sin valor de: ferr-alia, papir-alia, cos-alia.
- astro** Inferior, sin valor; non genuin: medic-astro; patr-astro, matr-astra.
- ata** Contento o quantitate continite in un: coclear > coclear-ata, man-ata, pugn-ata.
- ato** Status, dignitate o officio de: episcop-ato, director-ato, doctor-ato, magistr-ato, novici-ato.
- ario** 1 (Lat. -arium) Loco pro collection de /substantivos/: herb-ario.
- ario** 2 (Lat. -arius) Persona habente le carga de un: bibliothec-ario, mission-ario,
- essa** 2 Forma feminin de titulos de nobilitate: princ-essa. cont-essa, baron-essa. 3 femina de animales non finiente per -o: leon-essa, tigr-essa.
- iera** Loco ubi vive o cresce: columb-iera, formich-iera, gallin-iera, taxon-iera, vulp-iera; aven-iera, ris-iera. 2 Receptaculo que contiene: farin-iera, mustard-iera, sauc-iera, sput-iera, tabach-iera, the-iera. Multissime parolas practic pote esser formate con iste suffixo!
- iero** Arbore, arbusto o planta portante fructos: fico > fich-iero, gumm-iero, persica > persich-iero, pir-iero, pom-iero, frambes-iero, frag-iero.
- ero** Persona qui labora professionalmente con: barb-ero, camer-ero, corb-ero, libr-ero, obr-ero, scarp-ero.
- eria** 1 Le local o le profession/mestiero del -ero 2
- etto** (le plus sovente) -**etta** si le substantivo original fini per -a. Diminu-

tivo. Un variante minor de ... (persona o cosa): pacco > pacchetto, cassa > cassetta.

-ismo Doctrina o religion: baha-ismo, christian-ismo, muhammedan-ismo, mystic-ismo, skeptic-ismo, social-ismo.

-ista 1 Adherente de un -ismo. **2** Persona qui labora con un arte o un profession technic.

Verbos >substantivos

-ada Action continuante o prolongate: cavalc-ada. (Derivatos de verbos in -e- e -i deberea secundo mi opinion haber -ida, p.ex. Curr-ida).

-age 2 Acto o le resultado de un /sol/ acto: heredit-ar > heredit-age, marit-ar > marit-age, tann-ar > tann-age.

-mento: -(a)mento post verbos con le vocal -a- ante le infinitivo e

-(i)mento quando iste vocal es -e- o -i-. Action, sovente un acto singular, "regardate con referentia a su effectos e resultatos" (Interlingua Grammar) o le resultado de un action: amend-a-mento, fund-a-mento, even-i-mento. Un suffixo con definition multo vage.

-or 1 Substantivo abstracte formate ab verbos finiente per -er e habente un adjetivo -ide. Stato o sentimento de ...: cal-or, ferv-or, frig-or, rig-or.

Le suffixos sequente debe esser precedite per le forma del supino latin:

Verbos finiente per -ar ha le forma -at-

Verbos finiente per -ir ha le forma -it-

Verbos finiente per -er sovente ha -it-, sed sovente conserva le morphema supinal del latino, -t- e -s-, lo que causa in multe casos un assimilation.

-or 2 Persona qui (o machina que) face qualcosa: cre-a-t-or, administr-a-t-or; con-sum-it-or; elev-a-t-or.

-orio Local ubi on face qualcosa: observ-a-t-orio, purg-a-t-orio, abatt-it-orio, aud-i-t-orio.

-ion Action o resultado de un action: organ-is-at- ion, add-it-ion, aud-i-t-ion.

-ura Action o plus sovente le resultado de un action: cre-at-ura, pic-t-ura (< pi-n-g-er), pol-i-t-ura.

Le affixos technic e scientific, le major parte de origine grec, es de frequentia minus grande e io debe lassar los hic extra consideration.

Cambio de vocales (apophonia)

Un phenomeno que ha jocate un rolo importante in le formation de parolas

in le latino – sed que ha solmente interesse historic pro nos, proque illo non plus ha un function in le formation de nove parolas – es le **apophonia, un cambio del vocal del morphema de base quando isto non es le prime morphema**. In le proto-latino le accento tonic probabilmente esseva sempre sur le prime syllaba e quando un prefixo es ponite como le prime syllaba iste reduction de vocales occurre in le morphema de base, non plus accentuate.

au > u clauder > in-cluder, > ex-cluder.

a > i si solmente un consonante seque (“syllaba aperte”, finiente per un vocal): fac-er – in-fic-er

a > e si duo consonantes seque: fac-er fac-t-o, ef-fec-t-o (< ex-fac-t-o)

e > i si solmente un consonante seque: reg-er, di-rig-er (< dis-reg-er)

e = e si duo consonantes seque: di-rec-t-ion (< dis-reg-t-ion).

Le verbos con duple themas

Quando le duo phenomenos “complica-le-vita”, le assimilation e le apophonia ambes se incontra in un morphema de base, se produce un allomorpho, un variante que sembla a prime vista bastante irregular

In *Interlingua Grammar* se trova un capitulo, un breve capitulo de tres paginas que face felice le inimicos del linguas naturalistic: Sur le pagina 85 comencia le appendice I *Double-Stem Verbs*. “Aha”, illes pensa, “in Interlingua il ha verbos irregular – le horror de tote studentes de linguas”. No, in Interlingua il *non* ha verbos irregular (excepte *sia* e le optionales *era* e *son*), si on non vole deviar del linguege practicate desde 50 annos. In illo on scribe “ha legite” e non “ha lecte”. Si isto es facibile in espaniol (ha leido) illo naturalmente debe esser regular in un idioma que ha su ration de exister per le besonio del rationalitate de haber un lingua facile. Ante le apparition del lista de discussiones INTERLNG in le Internet, io habeva vidite iste forma “lecte” apud solmente un sol persona durante mi longe periodo de active usator. Quando on informa re Interlingua il es sempre le enunciation “Il non ha verbos irregular” que evoca un approbation audibile!

Le usator/es/ del secunde thema del verbos como forma del participio passate non ha ben legite le capitulo: “In Interlingua the irregular second stem of verbs has nothing to do with matters of conjugation. It is a stem which occurs in certain derived nouns and adjectives and prevents these from assuming unnaturally distorted forms...”

Conclusion: Non introduce formas irregular del verbos!

Le lege del analogia – le plus forte dirigente del evolution de un lingua

Pro formar le femininos il ha le sequente vias:

1. Parolas differente quando le differentia del sexo es essential: viro – femina, patre – madre, tauro – vacca.
2. Si nostre infante es un filio o un filia, un puer o un puera non es sexualmente essential. Iste parolas es formate secundo le modello le plus frequente: **-o>a**. Parolas masculin finiente per un consonante adde un **-a**: senior – seniora. Possibile tamben professor – professora. (Preferibile al alternativa italiano plus longe: professoressa.)
- 3 A **-essa** sposa o filia de persona regal o nobile. B **-essa** feminino de animales, cuje masculinos non fini per **-o**: tigre – tigressa, leon – leonessa.
4. **-/tor (-s/or)>/trice**: traduc-t-or – traduc-t-rice. In titulos de profesiones le tendentia es de non cambiar le titulo masculino.

Substantivisation de adjективos da le occasion de monstrar le sexo.

“Le bello in le familia esseva le tertie filio e le bella le prime filia”. Hic *Interlingua Grammar* (§ 41) e le *Grammatica de Interlingua* de Karel Wilgenhof prescribe que certe adjективos non pote cambiar le forma. Inter illos se trova alcunes frequentissimo usate pro personas: *juvene, vetere, -ese*.

In quasi tote le linguas on ha quelque signo, methodos, modos de exprimer le feminino. In francese on adde in scripto un **-e**, que face audibile le consonante final. In espaniol on adde un **-a**, ex. profesor - profesora etc.

In Interlingua non existe multe possibilitates de indicar le sexo excepte al substantivo. In despecto de su propre regulas – theoreticamente fixate in le grammatica – dr. Alexander Gode ipse¹, un grande pragmatico, debeva multo tosto ceder al exigentia de claritate e usar le metodo natural – le maniera le plus frequente e regular: Ille scribe in *Scientia International - Novas del mense in Interlingua* (februario 1964) del hobby de multe feminas in Svedia de tricotar sweaters: “...in un anno x sweaters per svedesa”. **Le “systema linguistic inherente” de Interlingua exige que se usa tote le potential de expression del lingua mesme.** Il non ha spatio pro livrar le exemplification desirabile de isto, sed cata linguisita lo sape.

1 Le ultime director de recercas del International Auxiliary Language Association (IALA) que publicava in 1951 interlingua e assi le redactor in chef del “Interlingua-English Dictionary”

“Fundamentalistas” qui considera sancte le regulas de 1951 non lo comprehendera. Sed le lege de analogia regna.

Qui forma le lingua?

Le lexicographos, le grammaticos e le autores de manuales ha intialmente, quando il se tracta de un lingua plus o minus planificate, un grande influentia – in p.ex. Volapük e Esperanto quasi total – sed si tosto que un lingua entra in uso practic, le “creatores” es super toto le parlatores e le scribentes qui lo practica pro communicar in circumstantias quotidian. Le uso oral – le forma original de omne lingua natural – quasi totalmente es dirigite per le lege del analogia. Le prevalente structuras inherente de un lingua decide. Un scribente sovente ha le tempore pro reflecter, ponderar e consultar dictionarios e grammaticas. E si ille elige un mal solution pro esser ben comprendite, ille *non lo nota* per le reaction immediate del interlocutor. In conversations e discussiones ille lo nota e face immediatemente modificaciones in su communicato. Non habente un dictionario, ni un grammatica scripte disponibile – que face ille? Ille reformula su parola o expession secondo un modello usate multe vices antea: ille seque “le lege de analogia” – le procedura de un infante qui produce formas verbal correcte, sin saper alque de conjugationes o declinationes. E ille, como le infante, usa formas *regular* que se adapta a patronos cognite. Un exemplo: Habente legite o audite “linguas germanic, fенно-ugric, slavic” ille conclude que le grupo de linguas del descendentes del romanos es “romanic”. Ille non recurre, post recerca in dictionarios a un altere possibilitate “romance”, proque – tosto o tarde – ille senti que iste parola es confundibile con le “romance”, le aventura romantic o mesmo con un libro de un certe longor. Le scopo del language del humano non es solmente “esser comprehendite”, sed esser comprehendite sin ambiguitate, quandocunque ambiguitate e miscomprehension es *evitabile*.

Le IED esseva elaborate sub le direction de un *philologo* e un tal constata le existenita de vocabulos e lor significaciones sin considerar le exigencias del leges del linguistica. Un *linguistico* (linguista professional, experto del linguistica) non haberea proponite “Le Vocabulario International tal qual” pro scopos communicative sin recommendar regulas pro *seliger* inter synonyms historica- o principalmente justificabile. Ille haberea monstrate le strategias pro evitar homonyms innecessari. In avantia. Pro isto on debe regrettar que le professor André Martinet² debeva preferer un professorato a

2 Le penultime director de recercas del IALA

un universitate (a ille esseva offerite plures a ille momento) ante un coope-
ration continuata con doctor Gode in le elaboration de Interlingua, que
haberea devenite assi – io es certe – un medio de communication ancora
plus efficace jam ab le initio. Dr. Gode se monstrava postea esser un “ven-
ditor” genial del nove lingua, introducente lo in le sphaera ubi su uso es irre-
futabilemente utile: in le communication scientific. Un fato cruel interrum-
peva le developpamento in iste campo, que habeva tante promissas de suc-
cesso.

Hodie le anglese ha conquerite le medicina. Que iste modeste obretta
mie sia un adjuta in un altere campo – le utilisation de Interlingua como
propedeutico in pedagogia de linguas!

Ingvar Stenström:
Formation de parolas in Interlingua
(Societate Svedese pro Interlingua 1999)
ISBN 91-971940-4-2

Per le mesme autor:

Interlingua - instrumento moderne de communication international

1-e edition (Läromedelsförlaget/Esselte Studium 1972)

1*Textos 2-e edition, revidite (1989 Servicio de Libros UMI)

2*Svensk kommentar ISBN 90-71196-16-X

2*Méliklet magyarul ISBN 90-71196-02-2 (1987 Ferenc Jeszenszky)

2*Suplemento pro francophonos (1988 Danielsson-Mahé-Potet)

2*Suplemento pro germanophonos (1989 Zimmermann-Liebig)

2*Dansk udgave, 2-e ed. ISBN 87-89445-06-6. (1990 Andersen-Breinstrup-Frodelund)

2*Commentario pro lusophonos (1992 Waldson Pinheiro) ISBN 85-85453-02-8

2*Commentario. Norsk utgave (1992 D. & O. Oiseth)

2*Suplemento pro russophonos (1993 Jurij Cherednikov) (Tamben in Internet)

2*Supliment pentru români ISBN 90-71196-47-9 (1996 Toma Macovei):

2*Commentario pro poloneses (Malachowski-Wimmer) (Publicate in Internet)

In preparation:

2*Commentario pro hispanophonos (Euclides Bordignon)

Tema: Interlinguistica e Interlingua. Discursos public per Ingvar Stenström e Leland B. Yeager. (Union Mundial pro Interlingua 1991) ISBN 90-71196-17-8

Como inseniar Interlingua? Theorias e consilios practic. Un guida pro non-expertos. (Societate Svedese pro Interlingua 1993)

Interlingua-svensk ordbok. 25000 internationella ord. (Studentlitteratur, Lund, 1995), ISBN 91-44-60521-8

Occidental-Interlingue. Factos e fato de un lingua international. (Societate Svedese pro Interlingua, 1997), ISBN 91-971940-2-6